

आकाशवाणी

खबरां -----

1. प्रधानमंत्री नरेंद्र मोदी होरें महाकुम्भ गी एकता दा महायज्ञ दस्सदे होई इसी बदलाव दी शुरूआत करार दित्ता ऐ।
2. रेलवे मंत्री अश्विनी वैष्णव होरें आखेआ जे महाकुम्भ लेई 16 ज्हार थमां मतियां ट्रेनां चलाइयां गेइयां। साढे 4 करोड़ यात्रुएं ट्रेनें राएं सफर कीता।
3. केंद्री मंत्री पीयूष गोयल होरें भारत कालिंग कांफ्रेंस 2025 दा उद्घाटन करदे होई आखेआ जे बुनियादी ढांचे दे विकास ते आर्थिक बदलाव गी बेमिसाल पैमाने पर चलाने आहली सरकार दी रणनीतिक पैहलकदमियां न जिंदे पर इस स्तर पर पैहले कदें कम्म नेई होआ।
4. अमरीकी राष्ट्रपति डोनाल्ड ट्रम्प होरें इक नमी गोल्ड कार्ड पैहलकदमी शुरू कीती ऐ जेदा मकसद शीर्ष अंतरराष्ट्रीय प्रतिभाएं गी चेचे तौरा पर भारत थमां अपनी भेठा आकर्षित करना ऐ।
5. आई.सी.सी पुरुष चैंपियन्स ट्रॉफी च मेजबान पाकिस्तान ते बांग्लादेश बश्कार अज्ज लगातार बरखा बरने करी विजन कुसै गेंद खेड्डे दे मैच रह होआ।

<><><><><><>

PM-Mahakumbh

महाकुम्भ गी एकता दा महायज्ञ दस्सदे होई प्रधानमंत्री नरेंद्र मोदी होरें आखेआ जे भारत गी अपनी विरासत पर मान ऐ ते ओहू नमी उर्जा कन्नै अगगे बदा रदा ऐ। प्रधानमंत्री होरें प्रयागराज महाकुम्भ दी सफलता दी सराहना करदे होई आखेआ जे एहू आधुनिक प्रबंधन पेशेवरें ते नीति माहिरें आस्तै अध्ययन दा विशे ऐ। उनें आखेआ जे दुनिया भरै च बड्डे आयोजन दी मिसाल नेई थ्होंदी ऐं स्हाडे साधु

संतें इक बारी फही विकसित भारत लेई स्नेहा दित्ता ऐ। मोदी होरें आखेआ जे दुनिया नै अचम्बे कन्नै दिक्खेआ जे कियां करोड़ां बद्दे लोक प्रयागराज च संगम तट पर किट्टे होए। इनें लोकें गी कोई औपचारिक साद्दा नेई थ्होए दा हा। एहदे बावजूद करोड़ां बद्दे लोक अपनी मर्जी कन्नै महाकुम्भ आए ते संगम च पवित्र स्नान कीता।

<><><><><><>

Railways Minister Mahakumbh

रेल मंत्री अश्विनी वैष्णव होरें अज्ज आखेआ जे प्रयागराज च महाकुम्भ लेई 16 ज्हार थमां मतियां ट्रेनां चलाइयां गेइयां। प्रयागराज जंक्शन पर संवाददाताएं गी संबोधित करदे होई वैष्णव होरें आखेआ जे प्रयागराज थमां तकरीबन 4 करोड़ 50 लक्ख यात्रुएं ट्रेनें दे राएं यात्रा कीती। उनें दस्सेआ जे रेलवे नै पिछले ढाई बरे थमां एहदे च कम्म कीता ऐ ते तकरीबन 5 ज्हार करोड़ रुपें दा निवेश कीता ऐ। वैष्णव होरें आखेआ जे महाकुम्भ लेई 21 थमां मते फलाई ओवर ते अंडर पास बनाए गेन। उनें आखेआ जे एहदी योजना बनांदे समें यात्रुएं दी सखल्ले सफर करने पर ध्यान दित्ता गेआ हा।

<><><><><><>

Prez. Gujrat Visit

राश्ट्रपति द्रोपदी मुर्मू जेडियां 4 दिनें दे गुजरात दौरे पर न अज्ज प्रतिष्ठित स्टैच्यू ऑफ यूनिटी दा दौरा कीता ते लौह पुरुष सरदार वल्लभ भाई पटेल होरें गी पुष्पांजलि अर्पित कीती। राश्ट्रपति होरें जगत सफारी कीती ते एकता नगर च विविध वन्य जीवन दा भ्रमण कीता। राश्ट्रपति मुर्मू होरें एकता नगर च एकता कौशल विकास केंद्र दा दौरा कीता ते प्रशिक्षण कन्नै गल्लबात कीती।

<><><><><><>

Prez. European Commission

यूरोपीय आयोग दी अध्यक्ष उर्सूला वॉन डेर लेयन नमीं दिल्ली पुज्जी गेइयां न। ओहू यूरोपीय संघ दे कमिशनरें दे समूहें दी पैहली जात्तरा पर आइयां न। स्वास्थ्य ते परोआर कल्याण राज्यमंत्री अनुप्रिया

पटेल ने ब्हाई अड्डे पर उंदा सौआगत कीता। उर्सुला हुंदा अज्ज संण विदेश मंत्री एस. जयशंकर हुंदे कन्नै मलाटी करने दा कार्जक्रम ऐ। प्रधानमंत्री नरेंद्र मोदी होरें कल यूरोपीय आयोग दे अध्यक्ष दे कन्नै प्रतिनिधिमंडल स्तर दी वार्ता करंगन। यूरोपीय संघ दे 27 कमिशनरें चा 22 कमिशनर भारत दी 2 रोजा जात्तरा पर न। इस जात्तरा कन्नै दवखिया सरबंध होर निग्गर होंगन।

<><><><><><>

Finance-Minister

खजाना मंत्री निर्मला सीतारमण होरें आखेआ जे कुल संसारी स्तर पर सबभनें चुनौतियें दे बावजूद भारत तरक्की कन्नै अगड़ा बदा करदा ऐ। अज्ज नमीं दिल्ली च इक मीडिया सम्मेलन गी संबोधित करदे होई सीतारमण होरें आखेआ जे कुल संसारी आपूर्ति श्रृंखला दे केंद्रीकरण कारण मती सारिआं चुनौतियुं सामने आवा रदियां न। कुल संसारी बवस्था, विकसित मुल्लें पास्सेआ तय नेई कीती जाग। उनें आखेआ जे बपार ते प्रौद्योगिकी नमीं विश्व बवस्था च महत्वै आहली भूमिका निभाग ते भारत गी इस च शमूलियत करने दी लोड ऐ। मंत्री होरें आखेआ जे उद्यमी श्रेणी दी आसें-मेदें गी पूरा करने लेई केई बुनियादी मुद्दें पर ध्यान देना होग।

<><><><><><>

Bharat Calling

केंद्री बपार ते उद्योग मंत्री पीयूष गोयल होरें अज्ज मुम्बई च भारत कालिंग कांफ्रेंस 2025 दा उद्घाटन कीता। सम्मेलन गी संबोधित करदे होई उनें आखेआ जे भारत सरकार दी रणनीतिक पैहलकदमी जिंदे

च मेक इन इंडिया, डिजिटल इंडिया, स्टार्ट अप इंडिया ते आत्मनिर्भर भारत शामिल न, नवाचार, बुनियादी ढांचे ते विकास ते आर्थिक बदलाव गी बेमिसाल पैमाने पर चला करदी ऐ।

<><><><><><>

Pune Om Birla

लोकसभा स्पीकर ओम बिरला होरें आखेआ ऐ जे भारत दे युवा दुनिया दे सब्भनें थमां मते सूझ-बूझ ते शक्तिशाली या तगडे युवाएं च न ते उन्दे च बड्डी कुल संसारी चुनौतियें थमां पार पाने दा समर्थ ऐ। श्री बिरला होर अज्ज पुणे च भारती विद्यापीठ डीम्ड यूनिवर्सिटी दे 26में दीक्षांत समारोह च बोला रदे हे। उनें इस गल्लै पर जोर भरेआ जे मुल्ले दे युवाएं गी लोकतांत्रिक मुल्लें दी पालमा करनी लोड्चदी। श्री बिरला होरें देसा दे विकास च पुणे दे महत्व आहले योगदान दा जिक्र करदे होई आखेआ जे एह समाज सुधारेकं दी भूमि ऐ। समारोह दौरान 6 ज्हार 815 विद्यार्थिं गी डिग्री ते डिप्लोमा सर्टिफिकेट प्रदान कीते गे। इन्दे च 42 विद्यार्थिं गी सुन्ने दे मैडल प्रदान कीते गे।

<><><><><><>

DRDO

अंतरिक्ष विकिरण भारी आयाने ते मनुक्खी अंतरिक्ष मिशनं दे जैविक प्रभाव तंत्र ते जैव चिकित्सा प्रतिवाद पर अंतरराष्ट्री रेडियो बायोलॉजी सम्मेलन अज्ज नमीं दिल्ली च शुरू होआ। सरकार दे प्रधान वैज्ञानिक सलाहकार प्रो. अजय कुमार सूद ते रक्षा अनुसंधान ते विकास संगठन डीआरडीओ दे अध्यक्ष डॉ. समीर कामत होरें सम्मेलन दा उद्घाटन कीता। सम्मेलन दे महत्वै पर लो पांदे होई प्रो. सूद हारें आख्ेआ जे अंतरिक्ष अनुसंधान दे मिशन लगातर बदा रदे न ते एहदे कन्नै पैदा होने आहले विकिरण दा असर भविक्ख च बी बदोग। उनें आखेआ जे एह सम्मेलन इनें चुनौतिं दा हल करने च मदद करोग। डीआरडीओ दे अध्यक्ष डॉ. समीर वी. कामत होरें आखेआ जे एह सम्मेलन न सिर्फ अंतरिक्ष अनुसंधान सगुआं स्वास्थ्य थमां लेइयै भौतिक विज्ञान दी इक विस्तृत श्रृंखला गी समझने च बी मदद करोग।

<><><><><><>

Traffic-Advisory

नवयुग ते नाशरी सुरंग थाहर भारी बरखा होआ करदी ऐ। इस बजह करी केई सारी थाहरें जियां मेहर, कुनफर, पंथियाल, गांगरू, किशतवाड़ी पत्थर थाहर लगातार कुप्पड़ पवा'रदे न। दलवास मेहर, मराग थवां किशतवाड़ी पत्थर तगर यातायात दी आवाजाई बड़ी बल्ले होआ'रदी ऐ। लोकें सलाह दिती ऐ जे ओहू मौसम सरबंधी परामर्श दे आधार पर गै अपनी जात्तरा करना। कोई बी व्यक्ति जात्तरा थवां पैहले इनें नम्बरें 94199-93745 ते 18008-07043 पर राबता करिए जानकारी लेई सकदा ऐ।



Union Minister Athawale

सामाजिक न्याऽ ते सशक्तिकरण दे केंद्री राज्यमंत्री रामदास अठावले होरें अपने जम्मू दौरे दौरान जम्मू-कश्मीर च केंद्र सरकार तरफा चलाए जा'रदे विकास कम्में पर लोऽ पाई। जम्मू च कन्वेंशन सेंटर च इक प्रेस कांफ्रेंस गी संबोधित करदे होई अठावले होरें आखेआ जे जम्मू-कश्मीर थमां धारा 370 दा हटना केंद्र सरकार दी बड़ी बड्डी उपलब्धि ऐ। उनें आखेआ जे धारा 370 दे हटने थमां लेइयै अज्जै तोड़ी 2 करोड़ 50 लकख सैलानी जम्मू-कश्मीर आए न। एहदे शा पैहले लोक जम्मू-कश्मीर आने थमां डरदे हे। उनें भरोसा दोआया जे तौलें गै जम्मू-कश्मीर गी राज्य दा दर्जा दोबारा मिलोग। उनें दस्सेआ जे अज्जै तोड़ी पूरे मुल्लखे च 54 करोड़, 84 लकख 90 ज्हार बैंक खाते 2014 थमां लेइयै खोले गए न। मंत्री होरें आखेआ जे प्रधानमंत्री मुद्रा योजना PMMY स्कीम हेठ 51 करोड़ 93 लकख 43 ज्हार लोकें गी लौहके उद्योग चलाने आस्तै लोन दित्ते गे'न।



Trump Indians Citizensip

अमरीकी राष्ट्रपति डोनाल्ड ट्रम्प होरें इक नमीं गोल्ड कार्ड पैहलकदमी शुरू कीती ऐ जेदा मकसद शीर्ष अंतरराष्ट्रीय प्रतिभाएं गी खासतौरा पर भारत थमां अपनी भेठा आकर्षित करना ऐ। इस

पैहलकदमी कन्नै हार्वर्ड ते स्टैनफोर्ड ज्नेह प्रतिष्ठित अमेरिकी यूनिवर्सिटियों दे ग्रेजुएटें सने विदेशी नागरिकें गी 50 लकख डालर दी फीसद दे बदले च अमरीका च रौहने ते कम्म करने दी खुल्ल होग।

<><><><><><>

Assembly-Session

जम्मू-कश्मीर विधानसभा दे बजट सत्र गी लेइयै तैयारियां पूरे जोर-शोर कन्नै चला'रदियां ना। बजट सत्र 3 मार्च 2025 थमां शुरू होआ'रदा ऐ। आकाशवाणी जम्मू संवाददाता नै दस्सेआ ऐ जे सत्र दी शुरूआत जम्मू च उपराज्यपाल मनोज सिन्हा होर करडन। मेद ऐ जे उपराज्यपाल होर विधानसभा दे सदस्यें गी संबोधित करडन ते आने आहले माली बरे आस्ते सरकार दा नजरिया पेश करडन। सत्र गी सेही ढांचे, बगैर कुसा रूकावट दे तोड़ चाढ़ने आस्तै तफसीली इंतजाम कीते जा'रदे ना। विधानसभा परिसर दे आले-दोआले सुरक्षा दे पुख्ता इंतजाम कीते गेदे ना। सत्र च हिस्सा लैने आहले सदस्यें आस्ते हर तरीके दे प्रबंध कीते जा'रदे ना। इस सत्र च मुख्त तौर पर आर्थिक चर्चा ते बजट दे बक्ख-बक्ख पहलुएं बारै चर्चा कीती जाग जेड़ा गै जम्मू-कश्मीर आस्तै बड़ा मता अहम समझेआ जा'रदा ऐ। जम्मू-कश्मीर विधानसभा दा बजट सत्र उस्सलै शुरू होआ'रदा ऐ जिस्सलै प्रशासन पूरी चाल्ली विकास कम्में, कल्याण कार्जक्रमें ते आर्थिक विकास कन्नै जुड़ी दी नीतिएं पर कम्म करा'रदा ऐ।

<><><><><><>

Speaker-APM

जम्मू-कश्मीर विधानसभा दे स्पीकर अब्दुल रहीम राथर होरें अज्ज सारे राजनीतिक दलें कन्नै बैठक लाई तां जे अगले म्हीने 3 मार्च थमां शुरू होने आहला बजट सत्र सेही तरीके कन्नै तोड़ चढी सकै। सत्ताधारी पार्टी नेशनल कांफ्रेंस दे नुमाइंदें ते विरोधी दलें दे विधायकें इस बैठक च हिस्सा लैता। बीजेपी विधायक सुनील शर्मा होरें साफ कीता जे उन्दी पार्टी पीडीपी ते पीपल्स कांफ्रेंस तरफा आंदे दे प्रस्ताव यां बिल गी मंजूर नेई करोग कीजे एहू राजनीतिक दल राश्ट्र विरोधी ना। सी.पी.एम ते कांग्रेस

विधायक मोहम्मद युसुफ तारीगामी ते गुलाम अहमद होरें आखेआ जे पैहले विधानसभा सत्र च लोकें दे मसले पुट्टे जाडन जेडा गै 2018 च राष्ट्रपति शासन लागू होने मगरा हून होग। तारीगामी होरें आखेआ जे एह बजट सत्र सकारात्मक होना चाइदा ते सत्र चलाने आस्तै राजनीतिक दलें कन्नै सलाह-मिश्वर करना लोडचदा ऐ।



Cricket Champions Trophy

आई.सी.सी पुरूष चैंपियन्स ट्रॉफी क्रिकेट च अज्ज पाकिस्तान ते बांग्लादेश बश्कार रावलपिंडी क्रिकेट स्टेडियम च जेडा मुकाबला अज्ज खेड्डेआ जाना हा, ओह बरोबर होआ रदी बरखा करी इक बी गेंद नेई खेड्डे जाने दे चलने नेई होई सकेआ। 29एं बरें च एह पैहला मौका ऐ जिल्लै पाकिस्तान आई.सी.सी टूर्नामेंट च इक बी जित्त दर्ज कीते बगैर इस टूर्नामेंट थमां बाहर होई गेआ ऐ।

